

Rapport dalla seduta dil cussegl da vischnaunca dils 2 d' avrel 2025 en casa da scola ad Andiaast

Presenza:

- 11 commembers dil cussegl
- 2 suppleants cun dretg da votar
- 1 suppleant senza dretg da votar
- 1 commember dalla cumissiun da quen e gestiun
- 5 commembers dalla suprastanza communal + actuar

Hosps: 5 ulteriurs hosps

Il vice-president dil cussegl, Rolf Sgier fa in cordial beinvegni a tut ils presents alla seduta da questa sera.

La gliesta da tractandas, la quala ei vegnida tarmessa tier cun l'invitaziun, vegn suttamessa alla discussiun. Cunquei ch'ei vegn buca fatg diever da tala ei la gliesta per la seduta da questa sera ligionta.

1. Approbaziun dil protocol dalla seduta dil cussegl dils 14 da november 2024

Il protocol ei vegnius tarmess allas cusseglieras ed a tuts cussegliers. Il vice-president dil cussegl sutametta quel alla discussiun. Da tala vegn buca fatg diever. Il protocol vegn approbaus unanim (13:0).

2. Approbaziun: credit sanaziun Via S. Giacun (lingia d'aua e deflussiun)

Il vice-president dil cussegl tschenta la damonda d'entrar ed arva la discussiun. Da tala vegn buca fatg diever. Aschia ei l'entrada decidida e la fatschenta sa vegnir tractada.

Ils posessurs dalla via da quartier S. Giacun 62 – 82 a Breil giavischan da surdar quei toc via alla vischnaunca. Per saver far quei sto la via vegnir sanada sin il standart dalla vischnaunca e sin donn e cuost dils posessurs. Sper quella sanaziun ei era previu da remplazzar la lingia d'aua e da tschentar duas cazzolas da via.

Ils cuosts per la sanaziun dalla via vegnan purtai dils posessurs. La lingia d'aua e l'illuminaziun vegnan surpri dalla vischnaunca. Igl inschignier Iso Mazzetta ha tschentau ensemen il project ed ils cuosts.

Per la cumpart da cuosts dalla vischnaunca fa la suprastanza la damonda al cussegl da conceder in credit da frs. 200'000.00.

Clau Schlosser presenta la fatschenta e dat aunc ils sclariments necessaris. Sin las damondas sa vegnir dau risposta per cuntentientscha dils presents.

La discussiun vegn dada libra. Cunquei ch'ei vegn buca fatg diever dalla discussiun vegn votau giu. Il cussegl approbescha unanim (13:0) il credit per la sanaziun dalla Via S. Giacun a Breil.

3. Elecziun: cumissiun da cultura

Cun l'entschatta digl onn 2025 ha la suprastanza approbau ina ordinaziun da cultura. En connex cun quella ordinaziun ei previu d'eleger ina cumissiun da cultura. Per quella cumissiun han ils vischinadis fatg las suandontas propostas.

Michael Friberg, Breil
 Angela Gulli, Andiaast
 Patrick Albrecht, Dardin
 Marc Pfister, Vuorz
 David Flepp, Danis

La suprastonza fa la proposta d'eleger ils commembers per quella cumissiun sco proponiu. Il gerau da cultura fa part allas sedutas dalla cumissiun tenor basegns.

La discussiun vegn dada libra. Cunquei ch'ei vegn buca fatg ulteriuras propostas e diever dalla discussiun vegn votau giu. Il cussegl elegia unanim (13:0) ils commembers dalla cumissiun da cultura sco proponiu dils vischinadis.

4. V a r i a

Clau Schlosser informescha il cussegl sur dils differents projects en ellaboraziun, ni da quels che spetgan aunc sin la lubientscha:

- sanaziun via da meglieraziun Vuorz 1. etappa (Via Cantieni)
- la publicaziun dalla revisiun dil plan da zonas duess haver liug igl atun 2025
- las lavurs vid il reservoir e l'ovra a Danis duessen entscheiver quest'atun
- ei vegn proximamein publicau la damonda per la construcziun da duas casas cun en tut 16 habitaziuns (12 x 3 ½ e 4 x 2 ½ stanzas) per indigens a Breil
- las contractivas cun il militar, pertuccond la prolungaziun dil contract en dretg da baghegiar a Tschuppina, ein lantschadas
- l'adattaziun dallas sendas da viandar e da bike ein instradai ensemen cun las Pendicularas
- aschispert che la Regenza ha decidiu sur dils recuors en connex cun la sanaziun dalla via atras Danis, sa vegnir communicau igl agir vinavon. Avon sa ed astga la suprastonza buca comunicar giudlunder.
- la concessiun dallas Ovrar Frisal SA cuozza aunc tochen el 2040. Las contractivas tgei far, ein lantschadas e ston esser decididas els proxims 5 onns.
- ils moniturs d'informaziun els vischinadis vegnan montai proximamein.
- ensemen cun Surselva Tourismus vegn la vischnaunca ad adattar il carnet da pensums che cuora giu la fin dil 2025

Rolf Sgier engrazia per la preschientscha e la partizipaziun. El giavischa allas cusseglieras ed als cussegliers in bien retuorn a casa e siara la seduta allas 20:50 uras.

Breil, ils 7 d'avrel 2025

Il president

Igl actuar